

## Inatsisissatut siunnersuummut oqaaseqaatit

**Oqaaseqaatit nalinginnaasut**1. Inatsisissatut siunnersuutip tunngavia

Inatsisartut 1985-imi akuersissutigaaat malittarisassaq Kalaallit Nunaata avataani illu pigisaq qularnaveeqqusiullugu taarsigassarsiat erniaat isertitat akileraaruteqaataasussat naatsorsorneranni ilanngaatigineqarsinnaajunnaassasut. Malittaarisassakkut Kalaallit Nunaata avataani illuuteqartut ernianut aningaasartuutit pineqartunik akileraartarnermi marloriaammik ilanngaatiginnissinnaajunnaarput. Malittarisassap atuutilinnginnerani Kalaallit Nunaata avataani illunik pigisaqartut piumasaqaatit assigiinngitsut naammassineqarsimatillugit nunami maani nunamilu allami illup inissisimaffigisaani akileraartarnermi ilanngaateqarsinnaasarput. Tamatumalu kingunerisarpaa taarsigassarsisut ernianut pineqartunut aningaasartuutit akileraartarnermi periutsimit annertuumik aningaasaleeqataaffigineqartarnerat. Akileraartarnermut Aqutsisoqarfiup maanna paasisimavaa malittarisassaq taanna annertusiartortumik saneqqunneqartualersaq taarsigassarsiat illumik pigisamik qularnaveeqquserneqassanatik, eqqartuussivimmili nalunaarsuivimmut tuniseqqusinninneq qularnaveeqquseqqusinninnerlu nalunaarutigineqartarluni, tamatumalu kingunerisarlugu taarsigassarsiat erniaannut aningaasartuutit isertitanut akileraaruteqaataasussanut ilaalersarnerat.

Tamatuma saniatigut Naalakkersuisut isumaqarput akileraarutitigut isertitat ikililiivigineqarnissaannut illersuutit inunnut umiarsuarni timmisartuniluunniit sulisunut akileraartussaannermit tunngasut erseqqissaaviginissaat annertusaaviginissaallu siunnersuutigissallugu eqqortuusoq.

1991-imi Inatsisartut malittarisassat arlallit akueraat pinerullugit suliffeqarfiit Kalaallit Nunaanni aatsitassat il.il. pillugit inatsit (aatsitassanut inatsit) naapertorlugu ujarlermut iluaqutiginninnermullu akuerineqarsimasut. Ajornartorsiutit immikkut ittut arlallit aatsitassarsiornermi suliffeqarfinnut atuuttut aamma suliffeqarfinnut sermeq imerlu avammut nioqqutissat atorneqarnissaat pillugu pilersaarutilinnut aamma atuupput. Assersuutigalugu amigartoorutit ukiuni tulluuttuni tallimaannarni ukiumut isertitanit ilanngaatigineqarsinnaanerani malittarisassap suliffeqarfiit kalluarneqartut periarfissaarutitissinnaavai ilanngaatit ujarlernernik ingerlatsinernut atatillugu aningaasartuutit annertuunut iluaqutiginissaannut.

2. Inatsisissatut siunnersuutip imarisai

*Nunami allami illuutigisamut tunngasut erniaasa ilanngaatigineqartarnerat*

Siunnersuutigineqarpoq maanna § 15, imm. 4-mi aalajangersagaq annertusineqassasoq ilaalersillugu Kalaallit Nunaata avataaniitumik illusinermit ingerlanneqarneranulluunniit atukkanik taarsigassarsiat erniaannut aningaasartuutitut aamma atuuttunngorlugu, taamaalilluni taarsigassarsiat taamaattut tamarmik erniaat isertitanut akileraaruteqaataasussanut ilaajunnaarsillugit.

Siunertaasoq tassaavoq Danmarkimi, Savalimmiuni nunaniluunniit allani illuutigisap pisiarineranut pigineranullu aningaasalersuutaasunik taarsigassarsiat suulluunniit tamarmik erniaannut aningaasartuutit Kalaallit Nunaanni akileraarutaasusssanik isertitanit ilanngaatigineqarsinnaannginnissaat.

Siunnersuutip akileraarutitut tunngavigisat ilanngartuiffigineqarsinnaanerisa illuatungiliivigineqarnissaa siunertaraa.

*Kalaallit umiarsuaat timmisartualluunniit*

Siunnersuutigineqarpoq umiarsuarni timmisartuniluunniit sulinermit imaluunniit tamakkununga atasumik sulinermit akissarsiarititaasunut atatillugu inunmut tamakkiisumik killilimilluunniit akileraartussaataaernermut maleruagassat erseqqissaavigineqassasut annertusillugillu, umiarsuaq timmiartorluunniit:

1. nunami maani angerlarsimaffeqartutut nalunaarsorsimappat,
2. Danmarkimi, Savalimmiuni nunaniluunniit allani angerlarsimaffeqartutut nalunarsugaappat, umiarsuaq timmisartorluunniit inuttaqartinnagu kalaallit umiarsuaateqarfiannit timmisartuuteqarfiannilluunniit assartuutitut ingerlanneqarpat,
3. aammalu umiarsuaateqarfiup timmisartuuteqarfiulluunniit aqutsisorisarpiai nunami maani najugaqartuuppata, imaluunniit
4. sivikkinerpaamik qaammatini arfinilinni maani nunami aalajangersimasumik inissisimalluni sulisinneqartarpata.

Danskit, Savalimmiormiut nunamiluunniit allamiut umiarsuaateqarfiata timmisartuuteqarfiataluunniit umiarsuaq timmisartorluunniit inuttaqartinnagu assartuinermit atorpagu malittarisassat taakkua atuutissanngillat. Oqaaseqatigiinnut 4-imi taaneqartunut innersuussisoqannginneranut peqqutaasoq unaavoq, pissutsit piviusut tunngavigalugit danskit, savalimmiormiut imaluunniit nunanit allanit umiarsuaatileqatigiiffiit timmisartuutileqatigiilluunniit umiarsuarmik imaluunniit timmisartumik aalajangersimasumik inissiilluni assartuinissamut piumasaqaatit taaneqartut atuutsinneqarsinnaannginneri.

Akileraartussaanerup kingunerissavaa inuttat umiarsuarmi timmisartumiluunniit sulinerminnut atatillugu akissarsiaminnik Kalaallit Nunaannut akileraartussaannissaat.

Ilanngullugu siunnersuutigineqarpoq killilimmik akileraartussaalerneq ullormit siullermiit atuutilissasoq, taamaattumillu § 2, imm.1, nr. 1-imi ullunut 14-inut malittarisassamut ilaajunnaarlutik.

Aningaasarsianit akileraarutit pillugit inatsimmi § 70 aamma 71-imi maleruagassat aalajangersimasut naapertorlugit inuttaasut umiarsuarni pineqartuni sulinerminnut akissarsisartut Dansk International Skibsregisterimut aamma Akileraartarnermut Aqutsisoqarfiup akileraarnermut ilanngaatisat ilanngaatigereerlugit nalunaarsuiffiannut ilaasut allannguutissatut siunnersuutinit attorneqassanngillat.

*Suliffeqarfinnut ujarlernermit iluaqutiginninnermullu akuersissuteqartunut immikkut malittarisassat*

Siunnersuutigineqarpoq suliffeqarfiit sermimik imermillu ujarlerlutillu avammut niuernissaq siunertaralugu iluaqutiginninnissamut akuerineqartut suliffeqarfinnut aatsitassat pillugit inatsit naapertorlugu ujarlernermit iluaqutiginninnissamulluunniit akuerineqartunut akileraarutitigut naligititaalissasut.

Siunnersuut suliffeqarfinnut eqqartorneqartunut nassataqassaaq:

1. Suliffeqarfiit isertitat akileraaruteqaataasussat naatsorsorneranni aningaasat matusinissamut pilersaarummut akuerisaasumut immikkoortitat ilanngaatigisinnaagaat.
2. Amigartoorutinut nalinginnaasumik ukiunut tallimanut killiliineq atorineqassanngilaq.
3. Ingerlatat suliffeqarfiit akuerineqarnerannut ilaasut ataatsimut naatsorsorneqassapput suliffeqarfiup killilimmik akileraartussaataitanera apeqqutaatinnagu.
4. Suliffeqarfinnut kommunitut akileraarfik tassaassaaq akileraaruseriffik.

Suliffeqarfinnut pineqartunut ilisarnaataavoq ingerlataat Namminersornerullutik Oqartussanit akuersissummik tunngaveqartarmata. Akuersissutit tamakkua tunniunneqarnerat inatsisikkut aqunneqarpoq, aammalu inatsisip imaraa suliffeqarfiit arlalinnik pisussaaffeqarnerat, tamatumani ilanngullugu soorlu matusinissamut akuerineqartussamik pilersaaruserineq suliaralugu saqqummiullugulu.

Arlaqartutigut piffissaq misissueqqaarnerup aallartinneraniit suliffeqarfiup nioqqutissiulivinnerata isertitaqalerneratalu tungaanut ima sivilutigisinnaavoq suliffeqarfik malittarisassat atuuttut malillugit ujarlernermit aningaasartuutunik akileraarutitigut ilanngaateqarsinnaannginneri. Soorlu taamaalisoqarsinnaavoq selskabimut sermimik imermillu ujarlerlutillu avammut niuernissaq siunertaralugu iluaqutiginninnissamut pilersitsinissamut periarfissanik ujarlernermit akuerisaasumut.

Aallaavittut inuit, selskabit allallu aningaasarsianit akileraartarnermut inatsimmi § 2, imm. 1-imi malittarisassat arlallit malillugit killilimmik akileraartussaataitaasut isertitat akileraaruteqaataasussat isertitanut ataasiakkaanut, sumiiffimmut, suliffeqarfimmut il.il. immikkut naatsorsussavaat. Suliffeqarfiit nunatsinni ujarlernissamut ataasimit amerlanerusunik akuersissuteqartut tamatumuunakkut aningaasartuutitut suliffeqarfiup ujarlerluni ingerlataasa ilaannut tunngatillugu akileraarutitigut ilanngaateqarsinnaajunnaarsinnaapput. Soorlu suliffeqarfik killilimmik akileraartussaataitaasoq sermimik imermillu ujarlerlutillu avammut

niernissaq siunertaralugu periarfissanik marlunnik ujarlernissamut akuerineqarsimaguni akuersissutip aappaanit isertitai akuersissutip aappaaniit ilanngaatigineqarsinnaanngillat ujarlernermut akuersissutip aappaanna imermik avammut niuernissamik pilersitsinermik kinguneqarpat. Killiliineq tamanna aatsitassarsiornermut ilaanngilaq Naalakkersuisullu isumaat malillugu tamanna aamma atuuttariaqanngilaq sermip erngullu avammut nioqqutissatut atorineqarnissaat siunertalugu ujarlernermut iluaquteqarnermullu akuersissutini.

Akileraaruseriviup akileraarnermut kommunitut isigineqarnissaanik siunnersuut isigineqassaaq selskabinit pineqartunit isertitanit iluanaarutinillu akileraarutit landskassimut nakkartussaammata, tak. akileraaruserinermik ingerlatsineq pillugu allannguutissatut siunnersuut peqatigisaanik saqqummiunneqartoq naapertorlugu. Tamatumani isigimaneqarpoq sermimik imermillu avammut tunisaqarneq aatsitassanik paaanerup pissuseqataanik inuiaqatigiit ataatsimoorlutik pinngortitamit isumalluutaannik tunngaveqarmat. Sermimik imermillu avammut nioqqutissatut atorineqarneranit akileraarutinit iluanaarutaajunnartut pitsaanerpaamik inuiaqatigiinnut tamakkiisumik iluaqutaassapput iluanaarutit landskassimut nakkartarata.

### 3. Pisortanut aningaasatigut allaffissornikkullu sunniuttai:

Nunani allani illunut atatillugu erniat ilanngaatigineqarsinnaanerannik killiliineq aammalu inuttanut killilimmik akileraartussaanerannut malittarisassat erseqqissaavigineqarnerat, salliutillugu illersuutitut malittarisassatut iluseqarput ilimagineqarlunilu annikitsuinnarmik isertitaqaataassasut.

Suliffeqarfinnut avammut niuernissaq siunertaralugu sermimik imermillu ujarlerlutillu iluaqutiginninnissamut akuerineqartunut malittarisassat allanngortitaasut sermimik imermillu ujarlernermut iluaqutiginninnermullu malittarisassanut maannakkut atuuttuusunut sanilliullugit pilerinarnerulersitsipput, tamakkulerinermillu annertusisitsiniartussaallutik. Piffissaq ungasinnerusoq eqqarsaatigalugu isertitaqarnikkut qanoq sunniuteqartiginissaannut sermimik imermillu avammut nioqqutissatut atorineqarneranut atatillugu misissuinerni iluaqutiginninnermillu qanoq annertutigisumik ineriartortitsinissaq annertuumik apeqqutaassaaq, taamaattumillu maannakkut siunissami isertitatigut sunniutissat naliliiffigiuminaallutik.

### 4. Inuussutissarsiortunut aningaasatigut allaffissornikkullu kingunissai:

Inatsimmut siunnersuut inuussutissarsiortunut aningaasatigut allaffissornikkullu sunniuteqassanngilaq.

Piffissaq ungasinnerusoq eqqarsaatigalugu suliffeqarfinnut ujarlernermut iluaquteqarnermullu akuersissutaateqartunut immikkut malittarisassat aningaasatigut pitsaasumik sunniuteqarnissaat ilimagineqarpoq.

5. Avatangiisinut pinngortitamullu sunniutissai:

Inatsimmut siunnersuut avatangiisinut pinngortitamullu sunniuteqassanngilaq.

6. Innuttaasunut allaffissornikkut kingunerisassai:

Inatsimmut siunnersuut innuttaasunut allaffissornikkut sunniuteqassanngilaq.

7. Naalagaafeqatigiinnermut namminersulernermullu tunngasut:

Inatsimmut siunnersuut naalagaafeqatigiinnermut namminersulernermullu ingerlatsineranut attuumassuteqanngilaq.

8. Pisortat kattuffiillu tusarniaaviginerat:

Siunnersuut ukununga tusarniaassutigalugu nassiunneqarsimavoq:

KANUKOKA, Kalaallit Nunaanni Sulisitsisut Peqatigiiffiat (GA), ILIK, Nunaqavissut Suliffiutillit Kattuffiat (NUSUKA), Sulinermik Inuussutissarsiuteqartut Kattuffiat SIK), KNAPK, Inuutissarsiornermut, Suliffeqarnermut Inuutissarsiutinullu ilinniartitaanermut Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik aammalu Aatsitassarsiornermut Pisortaqaarfik.

Tusarniaanermut akissutit Akileraartarnermut Akitsuusiinermullu ataatsimiititamat ingerlatinneqarput.

Kalaallit Nunaanni Sulisitsisut Peqatigiiffiat aamma ILIK kissaateqarput § 2, imm. 1, nr. 17-imut siunnersuut akileraartarnikkut umiarsuup Kalaallit Nunaanni nalunaarsugaasup nunamilu allamiut umiarsuaata akornanni unammilleqatigiinnermi assigiimmik aallaveqarnerup allannortinneqannginnissaanut qulakkeerisuunersoq paaserusullugu. Siunnersuutip taamatut pisoqannginnissaa qulakkeersimappagu peqatigiiffiit allannguutit isumaqatigisinnaavaat. Tamatuma saniatigut Kalaallit Nunaanni Sulisitsisut Peqatigiiffiat aamma ILIK aalajangersakkanut allamik oqaaseqaateqanngillat.

§ 2, imm. 1, nr. 1-imut siunnersuut erseqqinnerusumik aalajangersimasunik pisoqartillugu inuttaasut akissarsiaannik akileraarusiisinnaanermik qulakkeerinntuuvoq tamatumuunalu akileraarutitigut isertitassat qaffasissusiat illersorniarneqarluni. Siunnersuutip Kalaallit nunanilu allamiut akileraaruseeriaasaasa assigiinnginnerisa unammillernermi assigiinngitsunik atugassaqaartitaanerit ikileriartissinnaassavai, taamatulli pisoqarnerit tamaasa pinngitsoortissinnaanngilai. Ilaatigut tamanna Kalaallit Nunaata pisut ilaanni marloriaammik akileraaruserneqannginnissamik isumaqatigiissutinit aquunneqarnera,

ilaatigullu siunnersuutip nunat tamat akornanni umiarsuarnut tunngatillugu nalinginnaasumik aaqqiinerit malinneqartut annertuumik aalaavigimmagit, aammalu ilaatigut pisimasuni siunnersuummi pineqartunut ilaanngitsuni inuttaasut akissarsiaannit nalinginnaasumik akiliisitsiniarnissaq ajornassalluni. Aningaasaqarnermut Nunanullu Allanut Tunngasunut Naalackersuisoqarfiup Kalaallit Nunaanni Sulisitsisut peqatigiiffiat ILIK-llu tamakkua pillugit oqarasuaatikkut ilisimatissimavai.

SIK, Aalisarnermut, Piniarnermut Nunalerinermullu Naalackersuisoqarfik aammalu Inuussutissarsiutinut, Suliffeqarnermut Ilinniartitaanermullu Naalackersuisoqarfik siunnersuummut oqaaseqaatissaqarsimanngilaq.

Tamakkua saniatigut tusarniaarnermut akissutinik allanik tigusaqartoqanngilaq.

## **Aalajangersakkanut ataasiakkaanut oqaaseqaatit**

### *§ 1-imut*

Nr. 1-imut

Aalajangersakkami aalajangerneqarpoq inuttatut sulisuusut Kalaallit Nunaanni angerlarsimaffeqanngitsut, nunamut maannga tamakkiisumik akileraartussaataitanerat qaqugukku atutilissanersoq.

Aalajangersakkami ilaapput akissarsiat suusulluunniit, tamatumani ilanngullugit sulisunut ajunngitsorsiassat akileraaruteqaataasussat suulluunniit. Umiarsuarmi timmisartumiluunniit inuttanut tunngatillugu erseqqissarneqarpoq kalaallit umiarsuaanni timmisartuanniluunniit sulilluni akissarsiat saniatigut ilaammata umiarsuarmi timmisartumiluunniit inuttaasup suliassarpiaanut atasumik suliat, soorlu inuttaasup angallammi sulineranut atasumik nunami suliat.

Umiarsuaq timmisartorluunniit Kalaallit Nunaanni angerlarsimaffeqarpoq, Kalaallit Nunaanni angerlarsimaffilittut nalunaarsorsimasoq, siunnersuummi § 1, imm. 2, nr. 1 naapertorlugu.

Umiarsuaq timmisartorluunniit nunami allami, Danmarkimi Savalimmiuniluunniit angerlarsimaffeqartutut nalunaarsorsimagaluarpuunniit, inuttaasut aalajangersakkami pineqartunut ilaapput, umiarsuaq timmisartorluunniit inuttaqartinnagu selskabimit assigisaaniluunniit, § 1, imm. 1, nr. 3-14, imaluunniit § 2, imm. 1, nr. 10-12 aamma 14-imi aalajangersakkat malillugit akileraartussaasuusumit assartuutitut atorneqarpat, siunnersuummi § 1, imm. 2, nr. 2 naapertorlugu. Aammattaarlu inuttaasut aalajangersakkami pineqartunut ilaasutut isigineqassapput, umiarsuaq timmisartorluunniit inuttaqartinnagu inummit, § 1, imm. 1, nr. 1 aamma 2, § 2, imm. 1, nr. 10-12 aamma 14-mi aalajangersakkat naapertorlugit akileraartussaataitasumit assartuutitut atorneqarpat. Umiarsuup

timmisartulluunniit inuttaqartinnagu atorneqarneqartutut oqaatigineqarnissaanut aalajangiisuusumik apeqqutaavoq, umiarsuup timmisartulluunniit atorneqartup tigu neranut atatillugu inunnik attartortitsisumi atorfeqartunik atorneqartumut malinnaasoqannginnissaa.

Umiarsuup timmisartulluunniit nr. 1-imut imaluunniit nr. 2-mut siunnersuummi ilaatinneqannginnera apeqqutaatinnagu inuttaasut aalajangersakkami pineqartunut ilaasutut isigineqarput, umiarsuaq timmisartorluunniit umiarsuaatileqatigiiffiup timmisartuutileqatigiiffiilluunniit aqutsisorpiavii Kalaallit Nunaanni najugaqarpata, § 1, imm. 2, nr. 3-mut siunnersuut naapertorlugu. selskabip aqutsisuisa nunami maani najugaqartuunersut aalajangiiffiginerani selskabimi aalajangiisarnermut atatillugu pissusiviusut erseqqissumik naliliiffigineqarnerannik tunngaveqassaaq. Taamatut naliliinermi selskabimik aqutsinermut atatillugu aalajangiinerit salliutillugit pingaartinneqassapput. Taamaattumik selskabi Kalaallit Nunaanni angerlarsimaffeqartutut isigineqakkajuttarpoq pisortaqarfia imaluunniit selskabip qullersaqarfia nunami maani inissisimappat. Siulersuisut selskabip ulluinnarni aqunneqarneranik qanoq isumaginnittuutiginerat apeqqutaalluni, siulersuisut sumi inissisimanerat annertuumik pingaaruteqassaaq selskabip maani nunami angerlarsimaffeqarneranik naliliiniarnermi. Taamaassimappat sumiiffik siulersuisut aalajangiiffigisaat, aqutsisut sumi najugaqarnerannut aalajangiisuvoq. Aalajangiinerit nalinginnaasumik ataatsimeersuarnerni aalajangerneqartartut aallaavittut selskabip nunami maani angerlarsimaffeqartutut isigineqarsinnaaneranut aalajaangiisuunngillat. Taamaammat aktiaateqarneq aallaavittut naliliinermut aalajangiisuunngilaq. Aalajangiinerit assersuutigalugu umiarsuaateqarfimmi nunami allami nalunaarsugaasumi, Kalaallit Nunaanni aalajangiineruppata, selskabi nunami maani angerlarsimaffeqartuussaaq. Selskabimulli tunngasut pillugit ataatsimiinnerit aalajangiinerillu tamarmik nunami allami pisarpata, aallaavittut selskabi nunami maani angerlarsimaffeqanngilaq. Tamatumanili naatsorsuutigineqarpoq aalajangiinerit nunami allami nunami maaniunngitsoq aalajangerneqartartuussasut.

Umiarsuaq timmisartorluunniit siunnersuummi nr.1 imaluunniit nr. 2-mut ilaatinneqanngikkaluarpalluunniit inuttaasut aalajangersakkami pineqartunut ilaasutut isigineqassapput umiarsuaq timmisartorluunniit nunami maani piffissami sivikinnerpaamik qaammatini arfinilinni ukiup qaammataani aqqaneq marluk iluanni inissisimappat, § 1, imm. 2, nr. 4-imut siunnersuut naapertorlugu. Umiarsuaq timmisartorluunniit Kalaallit Nunaanni aalajangersimasumik inissisimasuovoq umiarsuaq timmisartorluunniit qaammatini arfinilinni imaluunniit sivi sunerusumi ukiup qaammataani aqqaneq marluk iluanni Kalaallit Nunaata aningaasarsiorfittut killeqarfiata iluani imaluunniit Kalaallit Nunaata silaannartaani inissisimaguni, imaluunniit umiarsuaq timmisartorluunniit Kalaallit Nunaata aningaasarsiorfittut killeqarfiata iluani sumiiffimmiit avataani summiffimmut sumiiffinnulluunniit aalajangersimasumik uteqattaartuuguni, sumiiffik kingulleq taaneqartoq nunami allamiittuunngippat. Sivikitsumik umiarsuarmik timmisartumilluunniit taakkualuunniit atortuinik iluarsaataqarnermik, aserfallatsaaliinermik assigisaannilluunniit siunertaqartumik nunami allamiinnerit qaammatini arfinilinni malittarisassamik kipititsissutaanngillat. Taamatuttaaq qaammatini arfinilinni malittarisassamik kipititsinertut isigineqanngilaq nunami allamiinneq inuttanik

tamakkiisumik ilaannaakuusumilluunniit taarsiinissaq, taquassarsiniarneq assigisaanilluunniit siunertaqartumik pitillugu.

Siunnersuutigineqarpoq nr.1-miit nr. 3-mut malittarisassat, umiarsuaq timmisartorluunniit inuttaqartinnagu danskit, savalimmiormiut nunamiluunniit allami umiarsuaateqarfimmit timmisartuutileqatigiffimilluunniit assartuineranut atornerpat. Tamatumunnga atatillugu nr. 4-mut innersuussineqaannginneranut patsisaavoq, umiarsuaq timmisartorluunniit nr. 4-mi pineqartut ilaat danskit, savalimmiormiut nunamiluunniit allamiut umiarsuaateqarfiannit timmisartuuteqarfiannilluunniit inuttaqartinnagu assartuineranut atornerpat, umiarsuaq timmisartorluunniit nunami maani inissinneqarsimasutut isigineqarunnaassaaq, nr. 4-milu piumasqaatit atuuttuujunnaarlutik.

Nr. 2-imut.

Siunnersuutigineqarpoq ullunut 14-inut malittarisassaq inunnut umiarsuarni timmisartuniluunniit Kalaallit Nunaanni angerlarsimaffeqartuni namminneq sulillutik akissarsiorturnut atorunnaassasoq. Taamaattumik inuit taamaattut killilimmik Kalaallit Nunaannut akileraartussaataalissapput ullormit siullermiit § 2, imm. 1, nr. 17-imi aalajangersagaq naapertorlugu.

Nr. 3-mut.

Aalajangersakkami aalajangerneqarpoq umiarsuarni timmisartuniluunniit inuttaasut tamakkiisumik akileraartussaaneq pillugu malittarisassani pineqaanngitsut, § 1, imm. 1, nr. 1 (najugaqarfik) imaluunniit § 1, imm. 1., nr. 2 malillugu (minnerpaamik qaammatit arfinillit maaniissimaneq) sulinerminnut imaluunniit tamatumunnga atatillugu sulinerminnut akissarsiaqartut qaqugukkut killilimmik Kalaallit Nunaannut akileraartussanngussanersut.

Aalajangersakkami ilaapput akissarsiat suusulluunniit, tamatumani ilanngullugit sulisunut ajunngitsorsiasat akileraaruteqaataasussat suulluunniit. Umiarsuarmi timmisartumiluunniit inuttanut tunngatillugu erseqqissarneqarpoq kalaallit umiarsuaanni timmisartuanniluunniit sulilluni akissarsiat saniatigut ilaammata umiarsuarmi timmisartumiluunniit inuttaasup suliassarpiaanut atasumik suliat, soorlu inuttaasup angallammi sulineranut atasumik nunami suliat.

Umiarsuaq timmisartorluunniit Kalaallit Nunaanni angerlarsimaffeqarpoq, Kalaallit Nunaanni angerlarsimaffilittut nalunaarsorsimasoq, siunnersuummi § 2, imm. 1, nr. 17, litra a naapertorlugu.

Umiarsuaq timmisartorluunniit nunami allami, Danmarkimi Savalimmiuniluunniit angerlarsimaffeqartutut nalunaarsorsimagaluarpalluunniit, inuttaasut aalajangersakkami pineqartunut ilaapput, umiarsuaq timmisartorluunniit inuttaqartinnagu selskabimit assigisaaniluunniit, § 1, imm. 1, nr. 3-14, imaluunniit § 2, imm. 1, nr. 10-12 aamma 14-imi aalajangersakkat malillugit



akileraartussaasuusumit assartuutitut atorneqarpat, siunnersuummi § 2, imm. 1, nr. 17, litra b naapertorlugu. Aammattaarlu inuttaasut aalajangersakkami pineqartunut ilaasutut isigineqassapput, umiarsuaq timmisartorluunniit inuttaqartinnagu inummit, § 1, imm. 1, nr. 1 aamma 2, § 2, imm. 1, nr. 10-12 aamma 14-mi aalajangersakkat naapertorlugit akileraartussaataasumit assartuutitut atorneqarpat. Umiarsuup timmisartulluunniit inuttaqartinnagu atorneqartutut oqaatigineqarnissaanut aalajangiisuusumik apeqqutaavoq, umiarsuarsuup timmisartulluunniit atorneqartutut tiguneranut atatillugu inunnik attartortitsisumi atorfeqartunik atorneqartumut malinnaasoqannginnissaa.

Umiarsuup timmisartulluunniit litra a imaluunniit b-mut siunnersuummi ilaatinneqannginnera apeqqutaatinnagu inuttaasut aalajangersakkami pineqartunut ilaasutut isigineqarput, umiarsuaq timmisartorluunniit umiarsuaatileqatigiiffiup timmisartuutileqatigiiffiilluunniit aqutsisorpiavii Kalaallit Nunaanni najugaqarpata, § 2, imm. 1, nr. 17, litra c-mut siunnersuut naapertorlugu. Selskabip aqutsisuisa nunami maani najugaqartuunersut aalajangiiffigerani selskabimi aalajangiisarnermut atatillugu pissusiviusut erseqqissumik naliliiffigineqarnerannik tunngaveqassaaq. Taamatut naliliinermi selskabimi aqqutsinermut atatillugu aalajangiinerit salliutillugit pingaartinneqassapput. Taamaattumik selskabi Kalaallit Nunaanni angerlarsimaffeqartutut isigineqakkajuttarpoq pisortaqarfia imaluunniit selskabip qullersaqarfia nunami maani inissisimappat. Siulersuisut selskabip ulluinnarni aqunneqarneranik qanoq isumaginnittuutigerat apeqqutaalluni, siulersuisut sumi inissisimanerat annertuumik pingaaruteqassaaq selskabi maani nunami angerlarsimaffeqarneranik naliliiniarnermi. Taamaassimappat sumiiffik siulersuisut aalajangiiffigisaat, aqutsisut sumi najugaqarnerannut aalajangiisuuvoq. Aalajangiinerit nalinginnaasumik ataatsimeersuarnerni aalajangerneqartartut aallaavittut selskabip nunami maani angerlarsimaffeqartutut isigineqarsinnaaneranut aalajaangiisuunngillat. Taamaammat aktiaateqarneq aallaavittut naliliinermut aalajangiisuunngilaq. Aalajangiinerit assersuutigalugu umiarsuaateqarfimmi nunami allami nalunaarsugaasumi, Kalaallit Nunaanni aalajangiineruppata, selskabi nunami maani angerlarsimaffeqartuussaaq. Selskabimulli tunngasut pillugit ataatsimiinnerit aalajangiinerillu tamarmik nunami allami pisarpata, aallaavittut selskabi nunami maani angerlarsimaffeqanngilaq. Tamatumanili naatsorsuutigineqarpoq aalajangiinerit nunami aallami nunami maaniunngitsoq aalajangerneqartartuussasut.

Umiarsuaq timmisartorluunniit litra a-c-mut siunnersuummi ilaatinneqanngikkaluarpalluunniit inuttaasut aalajangersakkami pineqartunut ilaasutut isigineqassapput umiarsuaq timmisartorluunniit nunami maani sivikinnerpaamik qaammatini arfinilinni ukiup qaammataani aqqaneq marluk iluanni inissisimappat, § 2, imm. 1, nr. 17 litra d-mut siunnersuut naapertorlugu. Umiarsuaq timmisartorluunniit Kalaallit Nunaanni aalajangersimasumik inissisimasuuvoq umiarsuaq timmisartorluunniit qaammatini arfinilinni amerlanerusuniluunniit ukiup qaammataani aqqaneq marluk iluanni Kalaallit Nunaata aningaasarsiorfittut killeqarfiata iluani imaluunniit Kalaallit Nunaata silaannartaani inissisimaguni, imaluunniit umiarsuaq timmisartorluunniit Kalaallit Nunaata aningaasarsiorfittut killeqarfiata iluani sumiiffimmiit avataani sumiiffimmut sumiiffinnulluunniit aalajangersimasumik uteqattaartuuguni, sumiiffik kingulleq taaneqartoq nunami allamiittuunngippat. Sivikitsumik umiarsuarmik timmisartumilluunniit

taakkualuunniit atortuinik iluarsaataqarnermik, aserfallatsaaliinermik assigisaanilluunniit siunertaqartumik nunami allamiinnerit qaammatini arfinilinni malittarisassamik kipititsissutaanngillat. Taamatuttaaq qaammatini arfinilinni malittarisassamik kipititsinertut isigineqanngilaq nunami allamiinneq inuttanik tamakkiisumik ilaannaasumilluunniit taarsiinissaq, taquassarsiniarneq assigisaanilluunniit siunertaqartumik pitillugu.

Siunnersuutigineqarpoq litra a-miit c-mut malittarisassat, umiarsuaq timmisartorluunniit inuttaqartinnagu danskit, savalimmiormiut nunamiluunniit allami umiarsuaateqarfimmit timmisartuuteqatigiffimmilluunniit assartuinnermut atorneqarpat. Tamatumunnga atatillugu litra d-mut innersuussineqaannginneranut patsisaavoq, umiarsuaq timmisartorluunniit litra d-mi pineqartut ilaat danskit, savalimmiormiut nunamiluunniit allamiut umiarsuaateqarfiannit timmisartuuteqarfiannilluunniit inuttaqartinnagu assartuinnermut atorneqarpat, umiarsuaq timmisartorluunniit nunami maani inissinneqarsimasutut isigineqarunnaassaaq, litra d-milu piumasaaqatit atuuttuujunnaarlutik.

Nr. 4-mut.

Aalajangersakkami isumagineqarpoq illumut Kalaallit Nunaata avataaniittumut pisiarinerani pigineranullu aningaasaliissutaasunit erniat tamarmik nunami maani akileraarutaasussanik isertitanit ilanngaatigineqarsinnaannginnissaat.

Sulinermi malunnarsisimavoq pigisamik nunami allamiittumik qularnaveeqqusiilluni ernianut aningaasartuutit pillugit maannamut malittarisassat naammanngitsut, akileraartartut aalajangersagaq sanioqqutaartarsimammassuk aningaaserivinnik, taarsigassarsiniartarfinnik taarsigassarsisitsisartunilluunniit allat immikkut isumaqatigiissuteqarfiginerisigut, taarsigassarsisup illumi qularnaveeqqusiinissaanut taarsiullugu isumaqatigiissutigineqartarluni taarsigassarsisup illu qularnaveeqqusiussinnaanagulu allatulluunniit allamut tunniussinnaanagu taarsigassarsisitsisoq akuersissuteqaqqaartinnagu. Taamaaliornikkut taarsigassarsisitsisoq, taarsigassarsianut illumi qularnaveeqqusersimasutungajalluinnaq inissisimalissalluni. Malittarisassanik maannakkut atuuttuusunik saneqqutaarinerit illuatungiliiviginiarlugit, taarsigassarsiat illumut Kalaallit Nunaata avataani inissisimasumut pisinermi ingerlanneranilu aningaasaliissutinut atorneqartut tamarmik, Kalaallit Nunaanni isertitanik naatsorsuinermi ernianik ilanngaassisinnaanermut tunngaviliinngitsut aalajangiunneqarnissaa pisariaqarpoq.

Nr. 5-mut.

Siunnersuutikkut aalajangersagaq annertusineqarpoq sermip erngullu avammut nioqqutissatut atorneqarnissaat pillugu inatsisartut inatsisaat malillugit piginnaatitaasunutaaq atuutilersillugu.

Aalajangersakkap kinguneraa pisinnaatitaasup iluaquteqarnissamut akuerineqarsimasup matunissamut pilersaarutip piviusunngortinnissaanut aningaasatigut pisussaaffiup matussutissaatut illuartitani ilanngaatiguarinnaagai tassaammat ilanngaatit siuartitat. Saliinermut aningaasartuutit ingerlatsinermut aningaasartuutit ilanngaatigineqarsinnaapput, kisianni aningaasartuutit amerlassusiat aamma matusinerup piiaanerup inernerata kingornatigut pisarnera patsisaalluni ilanngaatigineqarsinnaanerisa annaaneqaratarsinnaanera patsisigalugu naapertuunerpaatut isigineqarsimavoq siunissami matusinissamut illuartiterineq ilutigalugit ilanngaatigineqarsinnaassappata.

Nr. 6-imut.

Siunnersuutikkut aalajangersagaq annertusineqarpoq sermip erngullu avammut nioqqutissatut atorneqarnissaat pillugu inatsisartut inatsisaat malillugit aamma pisinnaatitaasunut atulersillugu.

Aalajangersakkap kinguneraa pisinnaatitaasup ujarlernerumut iluaquteqarnermullu akuerisaasup piffissami killiligaanngitsumi amigartoorutit ukiumut isertitsivimmut tullermut nuussinnaagai, taamaattoq kisianni isertitanit akileraartarneq pillugu inatsimmi § 1 imaluunniit § 2 malillugu piffissami taamaallaat Kalaallit Nunaannut akileraartussaataaffiusumi. Taamaattoq amigartoorutit ukiumut isertitaqarfiusumut kingusinnerusumut nuunneqarsinnaapput ukiup siuliini akileraarutaasussanik isertitani inissaqartinneqanngippata aatsaat.

Piffissami killiligaanngitsumi nuussisinnaanermut ilaapput taamaallaat amigartoorutit akuersissummut atasumik ingerlatamut toqqaannartumik tunngasut. Tassalu amigartoorutit pisinnaatitaaffiup avataani ingerlatamut allamut tunngasut imm. 1 naapertorlugu nuunneqarsinnaapput taamaallaat ukiuni tallimani.

Pisinnaatitaasoq ataatsikkut piffissaniluunniit imminnut nikingasuni ujarlernissamut iluaquteqarnissamulluunniit akuersissuteqarpat piffissami killiligaanngitsumi nuussisinnaaneq akuersissutinut tamanut atuutissaaq.

Amigartoorutit siumut nuunneqarsinnaanerannut kiisalu kingumoortunngortissinnaanerannut aalajangersakkat allanngortinneqassanngilat. Akuersissummik peqartumut amigartoorutinik kingumoortitsisinnaaneq ukiunut tallimanut killeqartinneqaannassaaq.

Nr. 7-imut.

Siunnersuutikkut aalajangersagaq annertusineqarpoq sermip erngullu avammut nioqqutissatut atorneqarnissaat pillugu inatsisartut inatsisaat malillugit pisinnaatitaasunuttaaq atulersillugu.

Selskabit sermip erngullu avammut nioqqutissatut atorneqarnissaat pillugu inatsisartut inatsisaat malillugit ujarlernissamut iluaquteqarnissamulluunniit

akuerineqarsimasut aalajangersakkamut ilaanngillat tamanna ingerlatanut ilaasunut akuersissutini toqqaannartumik takuneqarsinnaappat. Tassalu selskabip taamaattup isertitat akileraaruteqaataasussat ataatsimoortillugit naatsorsorsinnaavai.

Nr. 8-imut.

Siunnersuutikkut aalajangersagaq annertusineqarpoq sermip erngullu avammut nioqqutissatut atorineqarnissaat pillugu inatsisartut inatsisaat malillugu pisinnaatitaassummik peqartunut aamma atuutilersillugu.

Tamatuma saniatiut Namminersornerullutik Oqartussat qitiusumik allaffitsigut aquneqarnerata aaqqissuuteqqinneqarnerata kinguneranik oqaasertat allangortinneqarput, taamaalilluni Akileraartarnermut Pisortaqarfik akileraaruserivimmik taarserneqassasoq siunnersuutigineqarluni.

Aalajangersakkami imm. 2-mi aalajangerneqarpoq inunnut nunap kommunitut agguarneqarnerata avataaniittunut akileraaruseriffik kommunitut akileraarfittut isigineqartoq. Tamanna aamma atuuppoq pisinnaatitaasunut iluaquteqarnissamut akuerisaasunut Kalaallit Nunaanni aatsitassat il.il. pillugit inatsit, sermip erngullu avammut nioqqutissatut atorineqarnissaat pillugu inatsisartut inatsisaat naapertorlugit. Pisinnaatitaasut Kalaallit Nunaanni aatsitassat il.il. pillugit inatsit, sermip erngullu avammut nioqqutissatut atorineqarnissat pillugu inatsisartut inatsisaat naapertorlugit ujarlernerimut pisinnaatitaasut aamma akileraaruseriffik kommunitut akileraarfigissavaat akuersissut taanna malillugu taamaallaat suliamik ingerlatsigunik.

Ujarlernerimut iluaquteqarnermulluunniit akuersissut akileraartussaalerup atuutilerfia kingoqqullugu tunniunneqarpat akileraaruseriffik akileraarnermi kommunitut akileraarfiussaaq ukioq aningaasanik isertitsivik akuersissutip tunniunneqarfia aallarnerfigalugu. Ujarlernerimut iluaqutiginninnermulluunniit akuersissut akileraartussaalerup suli qaangiutinnginnerani atorunnaarpat akileraaruseriffik akileraarnermi kommunitut akileraarfiussaaq ukioq isertitaqarfik akuersissutip atorunnaarfia ilanngullugu.

Pisinnaatitaasunut allanut akileraarnermi kommunitut akileraarfik aalajangerneqassaaq § 68, imm. 1 aamma 3-mi malittarisassat nalinginnaasut malillugit. Tamanna atuuppoq soorlu misissueqqaarnerinnarmut akuerisaasunut kiisalu ujarlernerinnarmut akuerisaasunut tamatumalu peqatigisaanik allamik ingerlatsisunut.

Imm. 3-mi aalajangersakkami maalaarnissamut malittarisassat aalajangerneqarput kommunalbestyrelsip akileraartussaataasulluunniit akileraarnermi kommunimik toqqaaneq isumaqatiginnippassuk.

Nr. 9-mut.

Siunnersuutigineqarpoq akileraartussaataasup akileraarutaagallartunik akileraaruserivimmut akiliiffissaa akileraarutininik A-nik unerartitat imaluunniit B-mik akileraarutininik akileqquneqartut saniatigut 1. aprilimiit 1. majimut kinguartinneqassasoq.

Akileraartussaataasooq akileraarutininik kinguaattooruteqarpat, tamatumani ilanngullugit erniat akiliutillu, ukiumut isertitaqarfimmut akiliiffissamut tunngasunik siumoortumik akilikkanit kinguaattoorutit taakkua ilanngaatineqassapput.

Ukiumi akileraarutissat aalajangerneqarfianni 1. majip kingornatigut nammineq piunassutsimik akiliisoqarpat akiliut utertillugu akilerneqassaaq.

#### *§ 2-mut*

Siunnersuutigineqarpoq inatsisartut inatsisaat 1. januar 2009-mi atortuulissasoq.